

आकाशवाणी जयपुर-अजमेर
प्रादेशिक समाचार
दिनांक 27.12.2025 समय: 18.45 बजे

- मुख्यमंत्री भजनलाल शर्मा कह्यो —अरावली पर्वत माला प्रदेश री अनमोल कुदरती धरोहर—राज्य सरकार इण ने बचावणो तैय कीनों
- प्रदेश मांय पंचायतीराज अर शहरी निकाय चुनावां री तैयारियां तेज—राज्य निर्वाचन आयोग दिशा—निर्देश जारी कीनां
- प्रधानमंत्री नरेन्द्र मोदी काल आकाशवाणी ऊँ प्रसारित कर्या जावण वाळा खास कार्यक्रम मन की बात मांय विचार बतावेलां
- खालसा पंथ री सरुआत करण वाळा गुरु गोबिंद सिंह री 359वीं जयंती रे मौके आज वां ने सिरधा भाव सागे याद कर्या जा रह्या हैं

000

मुख्यमंत्री भजनलाल शर्मा कह्यो है के अरावली री डूंगरियां प्रदेश री अनमोल कुदरती धरोहर है अर राज्य सरकार इण ने बचावणो तैय कीनो हैं वे आज जयपुर मांय वन अर खनन विभाग रा अहलकारां सागे समीक्षा बैठक मांय बोल रह्या हां अरावली पर्वतमाला ऊं जुड़्या सुप्रीम कोर्ट रा फैसला पाछे प्रदेश मांय कर्या जा रह्या विरोध प्रदर्शन बीचे मुख्यमंत्री आ खास मीटिंग लीनीं ई मौके मुख्यमंत्री अहलकारां ने अरावली हलका मांय पौधा रोपण रा हुकम दीनां ई बीचे अरावली रा बारा मांय उच्चतम न्यायालय रा फैसला ने ध्यान राखता थकां प्रदेश मांय आज ई केई ठौड़ां प्रदर्शन करी ज्यां दौसा मांय अरावली बचाओ विरोध प्रदर्शन रे दौरान झगड़ो व्हे ग्यों अलवर मांय ई मामला मांय रैलियां निकाळी ज्यीं सीकर, धौलपुर, अजमेर, झुन्झुनू अर नागौर मांय ई ई ई फैसला रे खिलाफ प्रदर्शन रा समाचार हैं

000

प्रदेश मांय पंचायती राज अर शहरी निकायां रा चुनाव री तैयारियां तेज व्हे ग्यी हैं राज्य निर्वाचन आयोग पंचायती राज संस्थावां रा चुनाव सारु विगतवार दिशा—निर्देश जारी कीना हैं आयोग सगळा ज़िला कलेक्टरां ने पोलिंग पार्टिया बणावण रा हुकम दीना हैं हुकम रे मुजब महिलावां, दिव्यांगजन अर केंद्र सरकार रा कर्मचारी अर घणी जरूरी सेवा देवण वाळा कर्मचारियां ने मतदान ऊं जुड़ी ड्यूटी मांय नी लगाया जावेलां आयोग रे मुजब बुर्का या घूँघटा मांय मतदान केंद्र माथे आवण वाळी महिलावां री पिछाण सारु महिला कर्मचारियां री मदद ली जावेलां

000

देश मांय रेल रा मुसाफिरां री तादाद मांय लगातार बधोतरी ने ध्यान राखता थकां साल 2030 ताई देश रा 48 खास शहरां रा टेसनां सारु खास योजना बणाई जा रही हैं ई योजना मांय प्रदेश रा जयपुर अर जोधपुर टेसन ई चुणी ज्या हैं उत्तर पश्चिम रेलवे रा मुख्य जनसंपर्क अधिकारी कैप्टन शशि किरण बतायो के जयपुर कने खातीपुरा टेसन ने टर्मिनल टेसन रा तौर ऊं विकसित कर्यो जा रह्यो है अर जोधपुर कने भगत की कोठी टेसन माथे ई मॅटीनेंस कम वर्कशॉप डिपो बणायो जा रह्यो हैं

.....

लोकसभा अध्यक्ष ओम बिरला वां रा संसदीय हलका रा एक सप्ताह रा दौरा सारु आज कोटा पधार्यां वे जनसुणवाई कीनी अर अहलकारां ने जरूरी हुकम दीनां ई मौके वे आवता बगत मांय बुनियादी ढांचा ने और बेहतर बणावण अर आवण—जावण रा और चोखा सुबीता मुहैया करावण सारु कार्ययोजना बणावण बाबत कह्यो श्री बिरला कह्यो के रामगढ़ अर मुकुन्दरा टाईगर रिजर्व मांय बेगा ई और बाघ लाया जावेलां

.....

प्रधानमंत्री नरेन्द्र मोदी काल संवारे 11 बज्यां आकाशवाणी ऊं प्रसारित कर्या जावण वाळा खास कार्यक्रम मन की बात मांय विचार बतावेलं आ ई कार्यक्रम री 128वीं कड़ी व्हेलां ओ कार्यक्रम आकाशवाणी अर दूरदर्शन रा पूरा नेटवर्क, आकाशवाणी समाचार वेबसाइट अर न्यूज ऑन ए.आई.आर मोबाइल ऐप माथे प्रसारित कर्यो जावेलं ई सागे ई आकाशवाणी समाचार, डीडी न्यूज़, प्रधानमंत्री रा दफ़्तर अर सूचना अर प्रसारण मंत्रालय रा यू-ट्यूब चैनलां माथे ई ई कार्यक्रम रो प्रसारण कर्यो जावेलं

000

प्रधानमंत्री नरेन्द्र मोदी आज नई दिल्ली मांय राज्यां रा मुख्य सचिवां रा पांचवां राष्ट्रीय सम्मेलन मांय शामिल व्हां वां रो काल ई ई सम्मेलन मांय शामिल व्हेवण रो कार्यक्रम हैं काल ऊं चाल रह्या तीन दिन रा ई सम्मेलन रो मकसद देश रा विकास ऊं जुड़ी लगातार बातचीत ऊं केंद्र अर राज्यां बीचे भागीदारी ने बधावो देवणो हैं पेश है एक रपट—

उपमुख्यमंत्री दिया कुमारी आज जयपुर कने झपोक मांय पांच दिन रा सांभर महोत्सव रो उद्घाटन कीनीं ई मौके वे कह्यो के सांभर अब दुनियाभर ऊं आवण वाळा सैलाणियां री खास पसंद बणतो जा रह्यो हैं

दिया कुमारी कह्यो के सरकार सैलानियां रा सुबीता सारू लगातार विकास रा काम करा रही हैं 31 दिसम्बर ताई चालण वाळां ई मेळा मांय पतंग अर फोटो री प्रदर्शनी ई लगायी ज्यी हैं

000

खालसा पंथ री सरूआत करण वाळा गुरु गोबिंद सिंह जी री 359वीं जयंती आज सिरधा भाव सागे मणायी जा रही हैं ई मौके गुरु गोबिंद सिंह री माँ अर वां रा साहिबजादां री शहादत ने ई नमन कर्यो जा रह्यो हैं राष्ट्रपति द्रौपदी मुर्मू, उपराष्ट्रपति सी.पी. राधाकृष्णन अर प्रधानमंत्री नरेन्द्र मोदी गुरु गोबिंद सिंह जी रा प्रकाश परब रे मौके शुभकामनावां दीनी हैं राष्ट्रपति द्रौपदी मुर्मू सोशल मीडिया पोस्ट रे जरिये कह्यो के गुरु गोबिंद सिंह जबरदस्त हिम्मत अर असाधारण बुद्धिमानी ऊं लोगां ने धार्मिक जीवन जीवण री सीख दीनीं प्रधानमंत्री कह्यो के गुरु गोबिंद सिंह हिम्मत, दया अर त्याग री निशाणी हैं प्रदेश मांय ई गुरु गोबिंद सिंह जयंती रे मौके 359 वों प्रकाश परब सिरधा भाव सागे मणायो जा रह्यो हैं पाली रा सूरजपोल गुरुद्वारा मांय सोहवणी सजावट करी ज्यी है अर अखंड शबद कीर्तन राख्यो जा रह्यो हैं राज्य मांय न्यारा—न्यारा गुरुद्वारां मांय शबद कीर्तन अर लंगर रा कार्यक्रम राख्या जा रह्या हैं

000

बड़ा दिन अर अंग्रेजी नुवा साल रा जश्न अर छुट्टियां मनावण सारू प्रदेश मांय सैर—सपाटा री ठौड़ां मोटी तादाद मांय सैलाणी पूग रह्या हैं जयपुर, जैसलमेर, जोधपुर, उदयपुर, चित्तौड़गढ़ अर रणथंभौर मांय सैलानियां री मोटी तादाद निजर आ रही हैं रणथंभौर अर सरिस्का मांय ई मोटी तादाद मांय सैलानी पूग रह्या हैं सैलानियां री मोटी तादाद रे कारण जयपुर रा परकोटा हलका मांय आवण—जावण री परेशानी व्हेवण लागी हैं प्रशासन रे मुजब राजधानी जयपुर मांय एक लाख ऊं बत्ता सैलानियां रे आवण रा आसार हैं

000

सूफी संत ख्वाजा मोइनुद्दीन हसन चिश्ती रो आठ सौ चौदहवों सालाना उर्स अजमेर मांय कुल री रस्म सागे पूरो व्हे ग्यो हैं आज दोपहरां पाछे एक बज्यां महफिलखाना मांय कुल री रस्म अदा करी ज्यीं ई पाछे रीत मुजब जन्नती दरुजो बंद कर दियो ज्यों ई मौके देस—परदेस ऊं आया जायरीन, खादिम अर अकीदतमंद अमन—चैन, भाईचारा अर खुशहाली री दुआ मांगीं कुल री रस्म पाछे महफिलखाना मांय मलंग अर कलंदर परंपरागत दंगोल री रीत कीनीं रीत मुजब बड़ा कुल री रस्म तीस दिसंबर ने अदा करी जावेलं

000

जोधपुर मांय चाल रह्या पश्चिमी राजस्थान उद्योग हस्तशिल्प उत्सव 2026 रा तैत आज मेहंदी माण्डण री होड़ राख्यी ज्यी जिण मांय 40 महिलावां सिरकत कीनीं "ऑपरेशन सिंदूर" री थीम माथे आधारित मेळा री झलक मेहंदी कला मांय ई साफ तौर ऊं निजर आयीं बाड़मेर मांय 30 दिसंबर ऊं अमृता हाट बाज़ार लगायी

जावेलां 3 जनवरी ताईं लागण वाळी हाट मांय न्यारा—न्यारा ज़िलां रा 100 ऊँ बत्ता महिला स्वयं सहायता समूहां री ओर ऊँ 50 ऊँ बत्ती स्टॉल्स लगायी जावेलां

000